

VI KAZNENE ODREDBE

Članak 37.

Novčanom kaznom od 300 KM do 1.500 KM, kaznit će se za prekršaj pročelnik organa uprave, odnosno odgovorna osoba u pravnoj osobi na koju su prenesene javne ovlasti:

1. ako primi u radni odnos službenika, suprotno odredbama članaka 4., 8. i 9. ovog Zakona;
2. ako ne prijavi službenika, koji je stavljen na raspolaganje, sukladno članku 7. ovog Zakona;
3. ako izvrši raspoređivanje službenika, suprotno odredbama članaka 12. i 13. ovog Zakona.

VII PRIJELAZNE I ZAVRŠNE ODREDBE

Članak 38.

Posebna službena zvanja stečena po propisima koji su do donošenja ovog Zakona, bili primjenjivani na području Kantona, priznaju se kao posebna službena zvanja utvrđena ovim Zakonom.

Službenik koji je premješten iz jednog u drugi organ uprave, zadržava stečeno službeno zvanje.

Članak 39.

Na pročelnike organa uprave i njihove zamjenike, koji po isteku mandata, ne budu ponovo imenovani na istu ili drugu funkciju, a ne mogu ostvariti pravo da se vrate na rad u organ ili pravnu osobu u kome su prije radili, sukladno se primjenjuje odredba članka 21. ovog Zakona.

Članak 40.

Vlada će donijeti propise iz svoje nadležnosti, za koje je ovlaštena ovim Zakonom, u roku od tri mjeseca od dana stupanja na snagu ovog Zakona.

Članak 41.

Pročelnik organa uprave donijet će nove ili uskladiti postojeće opće akte organa uprave, koji se odnose na unutarnji ustroj, radne odnose i plaće službenika, u roku od 30 dana od dana stupanja na snagu ovog Zakona.

Članak 42.

Ovaj Zakon stupa na snagu osmog dana od dana objavljivanja u "Službenim novinama Tuzlanskog kantona".

Bosna i Hercegovina
Federacija Bosne i Hercegovine
TUZLANSKI KANTON

Sabor
Broj: 01-02-372-15/01
Tuzla, 6. 12. 2001. godine

Predsjednik
Sabora Tuzlanskog kantona

Dr. Izet Žigić, v.r.

435

Na osnovu poglavlja IV, odjeljak B, člana 33. stav 1. tačka e) Ustava Tuzlanskog kantona, donosim

UKAZ**O PROGLAŠENJU ZAKONA O LOVSTVU**

Proglašava se Zakon o lovstvu, koji je donijela Skupština Tuzlanskog kantona na sjednici od 6. 12. 2001. godine.

Broj: 01-2018/01
Tuzla, 20. 12. 2001. godine

Predsjednik
Tuzlanskog kantona,
Mr. Selim Bešlić, v.r.

ZAKON O LOVSTVU**I OPĆE ODREDBE**

Član 1.

Lovstvo obuhvata uzgoj, zaštitu, lov i korištenje lovišta, divljači i njenih dijelova, uređenje lovišta, kao i funkciju zaštite i očuvanja biološke i ekološke ravnoteže prirodnih staništa divljači na području Tuzlanskog kantona (u daljem tekstu: Kanton).

Član 2.

Divljač su određene vrste životinja koje slobodno žive u prirodi i na površinama namijenjenim za intenzivni uzgoj i razmnožavanje divljači na području Kantona, osim u posebno ograđenim prostorima u kojima se vještački uzgaja divljač.

Divljač je vlasništvo Kantona i, kao dobro od općeg interesa, uživa posebnu zaštitu.

Član 3.

Prema namjeni, lovstvo može biti privredno, sportsko i lovstvo s posebnom namjenom.

Pod privrednim lovstvom podrazumijeva se bavljenje lovstvom u svrhu sticanja dohotka.

Pod sportskim lovstvom podrazumijeva se bavljenje lovstvom radi lične razonode i rekreacije.

Pod lovstvom s posebnom namjenom podrazumijeva se bavljenje lovstvom u cilju naučnih istraživanja, nastave, zaštite naročito rijetkih životinja, kao i za druge potrebe utvrđene posebnim propisima.

Član 4.

Radi ostvarivanja općeg interesa za unapređenje uzgoja i zaštite lova i iskorištavanja divljači u privredne i sportske svrhe, kao i za očuvanje biološke i ekološke ravnoteže prirodnih staništa divljači, udruženja građana lovaca i pravna lica registrirana za obavljanje poslova iz oblasti lovstva udružuju se u Savez lovačkih društava Kantona.

Poslove lovstva, unapređenja lovnog odgoja i edukacije, lovne etike, lovne propagande i lovnog turizma, čuvanja i prikazivanja vrhunskih trofeja i druge poslove u vezi s razvojem i unapređenjem lova, vrše udruženja građana lovaca, te pravna lica registrirana za obavljanje poslova iz oblasti lovstva (u daljem tekstu: udruženja i pravna lica).

II DIVLJAČ I ZAŠTITA DIVLJAČI**1. DIVLJAČ**

Član 5.

Divljač su slijedeće vrste životinja:

a) dlakava divljač:

- glodari (Rodentia): zec (*Lepus europaeus*), bizamski pacov (*Ondatra zibethicus*), puh veliki (*Glis glis*) i vjeverica (*Sciurus vulgaris*);

- zvijeri (Carnivora): divlja mačka (*Felis silvestris*), lisica (*vulpes vulpes*) vuk, (*Canis lupus*), kuna zlatica (*Martes martes*), kuna bjelica (*Martes foina*), smeđi tvor (*Putorius putorius*), mala lasica (*Mustela nivalis*), velika lasica hermelin (*Mustela erminea*), jazavac (*Meles meles*), vidra (*Lutra lutra*) i mrki medvjed (*Ursus arctos*);

- dvopapkari (*Artiodactyla*): divlja svinja (*Sus scrofa*), srna (*Capreolus capreolus*), jelen obični (*cervus elaphus*) i divokoza (*Rupicapra rupicapra*).

b) pernata divljač:

- prave koke (*Gallidae*): fazani (*Phasianus sp.*), obična prepelica (*Coturnix coturnix*), jarebica poljska - trčka (*Perdix perdix*), jarebica šumska - lještarka (*Tetraster bonasia*) i tetrijeb veliki-gluhan (*tetrao urogallus*);

- divlje patke (*Anatidae*): patka gluvara (*Anas platyrhynchos*), patka pupčanica-grotovac (*Anas querquedula*), patka gogoljica (*Netta rufina*), patka kreketaljka (*Anas strepera*), patka lastarka (*Anas acuta*), patka batoglavica (*Bucefala clangula*), patka žiličarka (*Spatula cypeata*), patka ledera (*Clangula hyemalis*), patka krunata (*Aythya fuligula*) patka crna (*Melanitta nigra*), patka glavat (*Aythya ferina*), patka kržulja-kreklja (*Anas crecca*) i patka neretvanka (*Anas angustirostris*);

- divlje guske (*Anseridae*): guska divlja (*Anser anser*), guska lisasta (*Anser albifrons*) i guska glogovnjača (*Anser fabalis*);

- šljuke (*Scolopacidae*): šljuka bena (*Scolopax rusticola*), šljuka kokošica (*Capella gallinago*) i šljuka livadarka (*Capella media*);

- čaplje (*Ardeidae*): čaplja siva (*Ardea cinerea*), čaplja danguba (*Ardea purpurea*), čaplja žuta (*Ardeola ralloidea*), čaplja bijela (*Egretta alba*), gak kukavac (*Nycticorax nycticorax*), bukavac nebogled (*Botaurus stellaris*) i čaplja voljak (*Ixobrychus minutus*);

- rode (*Ciconiidae*): bijela roda (*Ciconia ciconia*), crna roda (*Ciconia nigra*), blistavi ražanj (*Plegadis falcinellus*) i žiličarka bijela (*Platalea leucordia*);

- labudovi (*Cygnidae*): labud crvenokljuni (*Cygnus olor*), labud žutokljuni (*Cygnus cygnus*) i labud crnokljuni (*Cygnus bewickii*);

- supovi - lešinari (*Vulturidae*): kostoberina žutoglava (*Gypaetus*), sup bjeloglavi (*Gyps fulvus*), strvinar bijeli (*Neophron percnopterus*) i sup smeđoglavi (*Aegypius monachus*);

- orlovi (*Aquilinae*): orao suri (*Aquila shryaetos*), orao krstaš (*Aquila heliaca*), orao klokotaš (*Aquila clanga*), orao kliktaš (*Aquila pomarina*), orao prugasti (*Hieraetus fasciatus*), orao patuljasti (*Hieraetus pennatus*), orao štekavac (*Haliaeetus albicilla*) i orao zmijar (*Ciraotus gallicus*);

- škanjci (*Buteoninae*): škanjac mišar (*Buteo buteo*), škanjac gačar (*Buteo lagopus*), škanjac bjelorepi (*Buteorufinus*) i škanjac ošar (*Pernis pavorus*);

- eje (*Cirus*): eja strnarica - poljska (*Cirus cyaneus*), eja močvarica (*Cirus aeruginosus*) i eja dalmatinska-stepska (*Cirus macrourus*);

- lunje (*Milvus*): lunja rdasta (*Milvus milvus*) i lunja crna (*Milvus migrans*);

- sokolovi (*Falconidae*): soko sivi (*Falco peregrinus*), soko kraguljac (*Falco subbuteo*), soko golubaš (*Falco cherug*), soko grlaš (*Falco subbuteo*), soko kraguljić (*Falco columbarius*), vjetruška kopčić (*Falco vespertinus*), vjetruška klikavka (*Falco tinnunculus*), vjetruša bjelonokta (*Falco naumanni*) i planinski soko (*Falco biarmicus*);

- nesiti pelikani (*Palicanidae*): nesit ružičasti (*Pelecanus onocrotalus*) i nesit kudravi (*Pelecanus crispus*);

- sivi ždral (*Grus grus*);

- jastrebovi (*Accipitridae*): jastreb kokošar (*Accipiter gentilis*), kobac ptičar (*Accipiter nius*) i kobac kratkoprsti (*Accipiter brevipes*);

- droplje (*Otididae*): droplja velika (*Otis tarda*) i droplja mala (*Otis tetrax*);

- liske (*Rallidae*): liska crna (*Fulica atra*), kokošica mlakara (*Rallus aquaticus*), guša zelenooka (*Gallinula chloropus*), kosac pepeličar-prdavac (*Crex crex*), štijska rida (*Porzana porzana*), štijska kusica (*Porzana pusilla*) i modra sultanka (*Porphyrio porphyrio*);

- žalarke (*Calidris*): žalar rdasti (*Calidris canutus*), žalar krivokljuni (*Calidris ferruginea*), žalac cerikavac (*Calidris alpina*), žalar ciganin (*Calidris minuta*), žalar crnčić (*Calidris temmincki*), žalar plosnokljuni (*Limicola falcinellus*) i žalar troprsti (*Crocethia alba*);

- prutke (*Totanus*): prutka krivokljuna (*Tringa nebularia*), prutka mrka (*Tringa erythropus*), prutka dugonoga (*Tringa stagnatilis*), prutka pjegava, (*Tringa ochropus*), prutka migavica (*Tringa glareola*), prutka mala (*actitis hypoleucos*), muljače (*Limosa*), muljača crvenorepa (*Limosa limosa*) i muljača smeđa (*Limosa lapponica*);

- vivak podzvizdač (*Vanellus vanellus*);

- pomornici: otimači (*Stercorariidae*), pomornik veliki (*Stercorarius skua*), pomornik širokorepi (*Stercorarius pomarinus*), pomornik kratkorepi (*Stercorarius parasiticus*) i pomornik dugorepi (*Stercorarius longicaudus*);

- galebovi (*Laridae*): galeb klaukavac (*Larus argentatus*), galeb čukavac (*Larus fascus*), galeb burni (*Larus canus*), galeb obični (*Larus ridibundus*), galeb crnoglavi (*Larus melanocephalus*), galeb troprsti (*Rissa tridactyla*) i galeb mali (*Larus minutus*);

- čigre (*Sternidae*): čigra mala (*Sterna albifrons*), čigra crna (*Chlidonias nigra*) čigra bjelobrađa (*Chlidonias hybrida*), čigra obična (*Sterna hirundo*), čigra debelokljuna (*Gelochelidon nilotica*), čigra dugokljuna (*Sternasendvicensis*) i čigra velika (*Hydroprogne caspia*);

- kirgiska sadja (*Cyrrhaptus paradoxus*);

- golubovi (*Colombidae*): golub divlji-pećinar (*Columba livia*), golub dupljaš (*Columba oenas*), golub grivnjaš (*Columba palumbus*), grlica (*Streptopelia turtur*), i gugutka (*Streptopelia decaocto*);

- sove (*Strigidae*): sova buljina - velika ušara (*Bubo bubo* L.), sova jastrebača (*Strix uralensis*), sova šumska (*Stix aluco*), sova utina (*Asio otus*), sova močvarica (*Asio flammeus*), kukuvija dremalica (*Tyto alba*), čuk obični (*Athena noctua*), sovica mrtvačka (*Aegolius fenereus*), jejić lulavac (*Otus scops*) i čukaša kukavica (*Glaucidium passerinum*);

- ronci (*Margidae*): ronac veliki (*Mergus merganser*), ronac srednji (*Mergus serrator*) i ronac mali (*Mergus albellus*);

- vranaci (*Phalacrocoracidae*): vranac veliki (*Phalacrocorax carbo*), vranac kukmaš (*Phalacrocorax aristotelis*) i vranac kaloser (*Phalacrocorax pugmaeus*);

- gnjurci (*Podicipidae*): gnjurac ćubasti (*Podiceps cristatus*), gnjurac ridoglati (*Podiceps griseigena*), gnjurac zlatouhi (*Podiceps nigricollis*), gnjurac ušati (*Podiceps auritus*) i gnjurac mali (*Podiceps ruficollis*);

- pljenori (*Gavidae*): pljenor veliki (*Gavia immer*), pljenor srednji (*Gavia arctica*), pljenor mali (*Gavia stellata*) i pljenor Žutokljuni (*Gavia adamsii*);

- gavran (*Corvidae*): vrana siva (*Corvus corone cornix*), vrana crna (*Corvus corone*), vrana gačac (*Corvus frugilegus*), čavka (*Coloeus monedula*), svraka (*Pica pica*) šojka (*Garrulus glandarius*), kreja lješnikara (*Nucifraga caryocatactes*), glaica crvenokljuna (*Pyrrhocorax pyrrhocorax*) i galica čolica (*Pyrrhocorax graculus*).

2. ZAŠTITA DIVLJAČI

Član 6.

Zaštita divljači vrši se stalnom ili privremenom zabranom lova i lovostajem.

Za vrijeme zabrane lova ili lovostaja određena vrsta divljači ne smije se loviti, proganjati ili namjerno uznemiravati, ako zakonom nije drugačije određeno.

Zabranjeno je da se lovljenjem ili na drugi način ugrozi opstanak bilo koje vrste divljači u prirodi.

Udruženja i pravna lica prije uvoza, odnosno unošenja - introdukcije divljači, obavezni su pribaviti saglasnost Ministarstva poljoprivrede, šumarstva i vodoprivrede Kantona (u daljem tekstu: Ministarstvo).

Član 7.

Za zaštićenu, određuje se slijedeća divljač:

a) dlakava divljač: divokoza, srna, mrki medvjed, jelen obični, zec i vjeverica; i

b) pernata divljač: prave koke, divlje patke, divlje guske, šljuke, čaplje (osim sive čaplje), rode, labudovi, supovi-lešinari, orlovi, škanjci, eje, lunje, sokolovi, nesit, sivi ždral, jastrebovi, droplje, liske, žalarke, prutke, muljače, vivak pozvizdač, pomornici, galebovi, čigre, kirgiska sadja, golubovi, sove, ronci, vranci, gnjurci, pljenovi, gavran, galica čolica i galica crvenokljuna.

Udruženja i pravna lica koja gazduju lovištem mogu proglasiti zaštićenom i divljač koja nije navedena u prethodnom stavu.

Član 8.

Stalna zabrana lova određuje se za slijedeće vrste zaštićene divljači: vjeverica, koka velikog tetrijeba, mali tetrijeb i njegova koka, koka šumska jarebica, čaplje (osim sive čaplje), rode, labudovi, supovi - lešinari, orlovi škanjci, eje, lunje, sokolovi, nesit, sivi ždral, jastrebovi, droplje, liske (osim crne liske), žalarke prutke, muljače, vivak pozvizdač, pomornici, galebovi, čigre, kirgiska sadja, sove, ronci, vranci, gnjurci, pljenori, galica, čolica, galica crvenokljuna i ptice pjevice.

Član 9.

Lovostajem zaštićena divljač je: mrki medvjed na uzgojnim područjima, srna, divokoza, jelen obični, zec, veliki tetrijeb-mužjak, fazan, prepelica, jarebica kamenjarka-grivna, jarebica poljska, jarebica šumska-mužjak, šljuke, divlji golubovi, grlica, divlje patke, divlje guske i crna liska.

Član 10.

Uzgojno područje za medvjeda obuhvata prostore na kojima postoje ekološki i prirodni uslovi za njegov opstanak.

Uzgojna područja ustanovljava Ministarstvo.

Član 11.

Privremena zabrana lova se određuje za vrste divljači čija je brojnost u lovištu osjetno smanjena uslijed vremenskih nepogoda, bolesti, požara ili iz nekih drugih razloga, a koju treba zaštititi za određeno vrijeme u cilju povećanja njihove brojnosti.

Zabranu iz prethodnog stava određuje udruženje ili pravno lice, odnosno organ koji gazduje lovištem.

Zabranu iz stava 1. ovog člana propisat će ministar poljoprivrede, šumarstva i vodoprivrede u Vladi Kantona (u daljem tekstu: ministar), ako tu zabranu ne odrede udruženje ili pravno lice, odnosno organ koji gazduje lovištem.

Član 12.

Ako od zaštićene divljači nastupi neposredna opasnost po život i zdravlje ljudi ili za imovinu pravnih subjekata i građana,

zaštićena divljač može se odstrjeliti, odnosno njen broj smanjiti, bez obzira na vrijeme zaštite i godišnji plan gazdovanja.

Odobrenje za odstrjel, odnosno smanjenje broja zaštićene divljači; izdaje Ministarstvo na osnovu mišljenja veterinarske službe i mišljenja udruženja ili pravnog lica, koje gazduje lovištem.

Član 13.

Ako se za zaštitu poljoprivrednih i šumskih kultura upotrebljavaju hemijska sredstva štetna za zaštićenu divljač, upotreba tih sredstava mora se vršiti na način koji je najmanje opasan za divljač.

Radi preduzimanja preventivnih mjera vlasnici, odnosno korisnici zemljišta u lovištu i okolnih zemljišta, dužni su da najkasnije 24 sata prije upotrebe sredstava, obavijeste udruženje ili pravno lice, odnosno organ koji gazduje lovištem o mjestu, vremenu i načinu upotrebe sredstava iz prethodnog stava.

Član 14.

Zabranjen je lov ptica i sisavaca korisnih za poljoprivredu i šumarstvo, kao i kvarenje i uništavanje njihovih gnijezda i legala i skupljanje i uništavanje mladunčadi i jaja, ako ovim Zakonom nije drugačije određeno.

Član 15.

Vlasnici lovnih pasa ne smiju puštati pse da se bez kontrole kreću po lovištu za vrijeme lovostaja, izuzev na prostoru za obuku pasa, koji je određen odlukom udruženja ili pravnog lica koje gazduje lovištem, uz prethodno mišljenje Saveza lovačkih društava Kantona.

Vlasnici svih vrsta nelovnih pasa, kao i mačaka, iste ne smiju puštati, da se kreću lovištem bez fizičkog nadzora vlasnika.

Udruženja i pravna lica koja gazduju lovištima dužni su da uništavaju pse i mačke koji se kreću bez kontrole po lovištu na udaljenosti većoj od 200 metara od naseljenih objekata.

Član 16.

Ovčarski psi mogu biti u lovištu samo uz stado.

Vlasnici pasa su odgovorni za štetu, koju njihovi psi učine udruženju ili pravnom licu koje gazduje lovištem.

Član 17.

Ministar će propisati vrijeme lova lovostajem zaštićene divljači i utvrditi koje se ptice i sisavci smatraju korisnim za poljoprivredu i šumarstvo.

III LOVIŠTA

Član 18.

Za vršenje djelatnosti lovstva, po pravilu, ustanovljavaju se lovišta.

Lovište se ustanovljava na površinama zemljišta ili voda, koje predstavljaju prirodnu i zaokruženu lovnoprivrednu cjelinu i na kojima postoje ekološki i drugi uslovi za uspješan razvoj lovstva, bez obzira na vlasništvo.

U lovne površine lovišta ne ulaze naselja, groblja, javni putevi, plantažni voćnjaci i vinogradi, gradski parkovi, kao i druge površine utvrđene posebnim propisima.

Aktom o ustanovljenju lovišta određuje se granica lovišta.

Granice lovišta moraju biti opisno obilježene i mora se uzeti u obzir prirodna migracija divljači.

Član 19.

Lovište ustanovljava Skupština Kantona na prijedlog Vlade Kantona uz prethodno pribavljeno mišljenje općinskog vijeća za svaku općinu.

Član 20.

Lovište se daje na gazdovanje jednom udruženju ili pravnom licu, koje je registrirano za vršenje djelatnosti lovstva.

Član 21.

Davanje lovišta na gazdovanje će se vršiti prema proceduri koja je propisana za davanje koncesija u Zakonu o koncesijama, a koju sprovodi Ministarstvo.

Lovište se može dati na gazdovanje za vrijeme važenja lovnoprivredne osnove.

Član 22.

Javni tender za sticanje prava gazdovanja nad lovištem će posebno sadržavati uslove gazdovanja i unapređenja lovišta, koji se odnose na objekte, uređaje, sredstva za gajenje i zaštitu divljači i stručne kadrove.

Udruženje ili pravno lice koje je korisnik zemljišta i voda na kojem je ustanovljeno lovište ima, pod jednakim uslovima konkursa, pravo prvenstva u dobijanju lovišta na gazdovanje.

Uslovi iz stava 1. ovog člana bit će detaljnije razrađeni Pravilnikom o uslovima za dodjelu lovišta na gazdovanje, koji će donijeti ministar.

Član 23.

O dodjeli lovišta na gazdovanje zaključuje se pisani ugovor.

Ugovor sadrži naročito: vrijeme na koje se daje lovište na gazdovanje, procjenu brojnog stanja divljači, uslove koje udruženje ili pravno lice mora ispunjavati, mjere koje je udruženje ili pravno lice dužno preduzeti u cilju unapređenja lovišta, uslove organiziranja i finansiranja lovočuvarske službe i sl.

Član 24.

Lovište se može oduzeti od udruženja ili pravnog lica kome je dato na gazdovanje u slijedećim slučajevima:

1. ako udruženje ili pravno lice prestane da ispunjava uslove određene zakonom i ugovorom;
 2. ako je potrebno da se zemljište ili voda koristi u svrhe koje isključuju mogućnost bavljenja lovstvom;
 3. ako se ustanovi lovište na osnovu člana 19. ovog Zakona.
- Ministarstvo je dužno šest mjeseci unaprijed obavijestiti udruženje ili pravno lice koje gazduje lovištem kada postupi po stavu 1. tačke 2. i 3. ovog člana.

Član 25.

Udruženje ili pravno lice kome je lovište oduzeto, ima pravo na naknadu štete po osnovu uloženi, a neiskorištenih sredstava, osim u slučaju iz člana 24. stav 1. tačka 1. ovog Zakona.

Visina naknade iz prethodnog stava utvrđuje se prema nalazu vještaka.

Naknadu plaća udruženje ili pravno lice kome se lovište, odnosno njegov dio daje na gazdovanje.

IV KATASTAR LOVIŠTA

Član 26.

Za svako lovište ustanovljava se i vodi katastar lovišta.

Katastar lovišta ustanovljava Ministarstvo, a vodi udruženje ili pravno lice koje gazduje lovištem.

O svim promjenama koje nastanu u toku gazdovanja lovištem, udruženje ili pravno lice koje vodi katastar dužno je obavijestiti Ministarstvo.

Član 27.

Bliže propise o ustanovljavanju lovišta, sadržini i načinu vođenja katastra lovišta, donosi ministar.

V LOVNOPRIVREDNA OSNOVA

Član 28.

Za svako lovište donosi se lovnoprivredna osnova, kao dugoročni plan za gazdovanje lovištem.

Lovnoprivrednu osnovu donosi udruženje ili pravno lice koje gazduje lovištem, uz saglasnost Vlade Kantona, uz prethodno pribavljeno mišljenje Ministarstva.

Odredbe lovnoprivredne osnove su obavezne.

Pravilnik o izradi lovnoprivredne osnove donosi ministar.

Član 29.

Izrada lovnoprivredne osnove može se povjeriti pravnom licu koje je registrirano za tu djelatnost i ima zaposleno lice sa završenim šumarskim fakultetom, ili licu sa navedenom stručnom spremom, koje ima odobrenje za obavljanje te djelatnosti, a u skladu sa Pravilnikom o izradi lovnoprivredne osnove.

Član 30.

Lovnoprivredna osnova donosi se za period od deset godina.

Šest mjeseci prije isteka važeće lovnoprivredne osnove mora se donijeti nova lovnoprivredna osnova.

Član 31.

Udruženje ili pravno lice koje gazduje lovištem dužno je da, u skladu sa lovnoprivrednom osnovom, donese godišnji plan u kome će predvidjeti naročite mjere za unapređenje lovstva, kao i obim korištenja pojedinih vrsta divljači.

Godišnji plan se donosi do 31. marta za period od 1. aprila tekuće do 31. marta naredne godine (lovna godina).

Lov se može vršiti tek poslije donošenja godišnjeg plana.

Godišnji plan dostavlja se Ministarstvu, najkasnije do 30. aprila, a izvještaj o izvršenju plana za proteklu godinu do 31. maja tekuće godine.

Član 32.

Udruženja i pravna lica koja gazduju lovištem dužna su voditi evidenciju o izvršenim radovima i provedenim mjerama predviđenim godišnjim planom i lovnoprivrednom osnovom.

Član 33.

Lovnoprivredna osnova, dugoročni program razvoja poljoprivredne proizvodnje i šumskoprivredna osnova moraju biti usklađene međusobno i sa prostornim planom područja za površine na kojima se lovište nalazi.

Član 34.

Vlasnici, odnosno korisnici zemljišta i voda na kojima se nalazi lovište, dužni su dozvoliti radnje i mjere gazdovanja lovištem predviđene lovnoprivrednom osnovom.

Član 35.

Sredstva koja udruženja i pravna lica ostvare u gazdovanju lovištem prvenstveno se koriste za gazdovanje i unapređenje lovišta, ukoliko ovim Zakonom i drugim zakonima nije drugačije određeno.

Pod unapređenjem lovišta smatra se:

- zaštita, održavanje i poboljšavanje životnih uslova za divljač u lovištu (poboljšavanjem ispasišta, dodatnim hranjenjem, održavanjem solila i pojilišta);
- dostizanje i održavanje odgovarajuće spolne i starosne strukture pojedinih vrsta divljači u okviru utvrđenog kapaciteta lovišta;
- unošenje novih vrsta divljači u lovište;
- čuvanje i zaštita divljači i lovišta;
- izgradnja lovnouzojnih i lovnotehničkih objekata (hranilišta, solila, pojila, lovački putevi i staze, osmatračnice, čeke i dr.);
- preduzimanje mjera za smanjenje šteta koje počinu divljač:
- stručno osposobljavanje kadrova;
- izrada planskih dokumenata (lovnoprivrednih osnova i dr.);
- naučno-istraživački rad u lovstvu; i
- nabavka rasnih pasa.

Ostvarena sredstva po osnovu ugovora o davanju lovišta na korištenje prihod su budžeta Kantona, a koriste se za razvoj i unapređenje lovstva, ukoliko drugim zakonima nije drugačije određeno.

VI LOV I KORIŠTENJE DIVLJAČI I NJENIH DIJELOVA I TROFEJI DIVLJAČI

1. LOV I KORIŠTENJE DIVLJAČI I NJENIH DIJELOVA

Član 36.

Lov divljači obuhvata traženje, osmatranje, slijeđenje, dočekivanje, odstrjel i hvatanje žive divljači, skupljanje uginule divljači i njenih dijelova, kao i korištenje divljači i njenih dijelova.

Član 37.

Pravo lova divljači imaju građani koji ispunjavaju uslove određene zakonom, propisima donesenim na osnovu zakona i općim aktima udruženja i pravnih lica koja gazduju lovištem.

Lov divljači može se vršiti samo dozvoljenim sredstvima, na propisan način i u određeno vrijeme.

Godišnji ulov zaštićene divljači može se vršiti samo u granicama godišnjeg prirodnog i vještačkog prirasta.

Član 38.

Udruženje ili pravno lice koje gazduje lovištem odredit će svojim općim aktom uslove i način pod kojim se može vršiti lov divljači, kao i učešće lovaca u iskorištavanju ulova u lovištu.

Član 39.

Odstrjel divljači dozvoljen je samo lovačkom puškom kuglarom sa izoliranim cijevi i puškom sačmaricom.

Izuzetno, od prethodnog stava, odstrjel medvjeda i srneće divljači dozvoljen je samo lovačkom puškom kuglarom sa izoliranim cijevi.

Član 40.

Divljač je zabranjeno loviti:

1. u vrijeme kada je, kao i na prostoru na kojem je divljač ugrožena poplavom, snijegom i požarom;

2. otrovom, zamkama, gvoždima, mrežama, klopnama i omamljujućim sredstvima;

3. gađanjem iz motornog vozila i gaženjem motornim vozilom;

4. upotrebom reflektora (farova), gramofona, magnetofona i sličnih naprava, živim i umjetnim mamicima ili pomoću naprava koje djeluju na principu infracrvenih zraka;

5. vojničkim oružjem, vojničkom municijom, malokalibarskom i poluautomatskom puškom sa više od dva metka;

6. hrtovima i nerasnim psima;

7. papkastu lovostajem zaštićenu divljač pomoću pasa; i

8. medvjeda progonom ili prigoonom.

Nerasnim psima iz tačke 6. prethodnog stava, smatraju se psi koji nisu registrovani kod nadležne kinološke organizacije i koji nemaju odgovarajući rodovnik.

Zabranjeno je progoniti divljač na tuđem lovištu bez odobrenja.

Zabranjeno je loviti divljač sačmom na površini do 200 metara udaljenoj od naselja, a kuglom do 500 metara.

Zabranjeno je sa psima proganjati divljač u periodu od 5. januara do 31. jula.

Član 41.

Izuzetno od odredbe člana 40. stava 1. tačka 2. ovog Zakona, Ministarstvo može odobriti udruženju ili pravnom licu koje gazduje lovištem odstrjel, odnosno hvatanje divljači mrežama, klopnama i omamljujućim sredstvima, ali samo za naučne svrhe, vještački uzgoj, preseljenje u druga lovišta, kao i za potrebe zooloških vrtova i izvoza.

Ranjena divljač može se tražiti pomoću lovačkog psa obučenog za traženje po krvnom tragu.

Uvjerenje o osposobljenosti lovačkog psa za traženje po krvnom tragu izdaje Bosanski kinološki savez.

Član 42.

Ministarstvo je ovlašteno:

1. skratiti lovostaj, ako je to potrebno radi smanjenja brojnog stanja pojedine vrste divljači ako ugrožava poljoprivredne, šumske i akva kulture, te ako zbog vremenskih nepogoda nije bilo moguće izvršiti planirani odstrjel divljači;

2. zabraniti lov za pojedinu vrstu divljači ako je to potrebno radi zaštite njenog brojnog stanja, pojave hemijskog ili radiološkog zagađivanja, te otklanjanja posljedica ratnog djelovanja i stradanja;

3. produžiti lovostaj ili zabraniti lov pojedine vrste divljači za određeno vrijeme, kada je to potrebno radi zaštite njenog brojnog stanja; i

4. zabraniti lov divljači na poljoprivrednim zemljištima zasijanim ili zasadenim poljoprivrednim kulturama u vrijeme kada bi to štetilo tim kulturama.

Član 43.

Divljač mogu loviti članovi lovačkih organizacija koji imaju položen lovački ispit.

Osobe koje su na visokoškolskoj ustanovi položile ispit iz predmeta lovstvo, oslobođene su polaganja lovačkog ispita.

Program i uslove polaganja lovačkog ispita donosi ministar.

Izuzetno od stava 1. ovog člana, divljač mogu loviti u pratnji lica sa položenim lovačkim ispitom:

- strani državljani kao lovci turisti,

- lovci pripravnici, i

- državljani Bosne i Hercegovine koji nisu članovi lovačkih organizacija.

Osobe iz prethodnog stava, mogu loviti divljač pod uslovima koje odredi udruženje ili pravno lice koje gazduje lovištem.

Član 44.

Trovanje divljači je zabranjeno.

Izuzetno od prethodnog stava, Ministarstvo može odobriti trovanje određene vrste divljači u slučaju neposredne opasnosti koja od te divljači zaprijeti životu ili zdravlju ljudi, zdravlju domaćih životinja ili opstanku zaštićene divljači. U odobrenju za trovanje odredit će se i način upotrebe otrova.

Član 45.

Zabranjeno je unošenje u lovište oružja koje nije lovačko (malokalibarka, vojnička puška, vazдушna puška i sl.).

Zabranjeno je kretati se ili voziti po tuđem lovištu sa lovačkim oružjem koje nije u futrolji ili prtljžniku.

Član 46.

Lov divljači na zemljištima koja se nalaze u zoni linije entiteta utvrđuje se posebnim propisom, a u skladu sa međuentitetskim dogovorom.

2. TROFEJI DIVLJAČI

Član 47.

Trofeje divljači predstavljaju divljač ili njen dio prema pravilima koja utvrđuje Međunarodni savjet za lov i očuvanje divljači (CIC).

Član 48.

Trofejima divljači smatraju se rogovi srnadaća, kljove divljevog vepra, lubanja i krzno medvjeda, vuka i divlje mačke, kao i cijeli primjerak tetrijeba.

Trofeji divljači moraju se ocijeniti.

Trofeji divljači mogu se iznositi iz lovišta uz trofejni list.

Udruženje ili pravno lice koje gazduje lovištem izdaje trofejni list i vodi evidenciju o izdatim trofejima.

Bliže propise o obliku, načinu i postupku izdavanja trofejnih lista donosi ministar.

Član 49.

Trofeje divljači ocjenjuje komisija koju imenuje ministar iz reda osoba koje imaju položen ispit za ocjenjivanje trofeja.

O ocijenjenim trofejima komisija iz prethodnog stava izvještava Ministarstvo, koje vodi centralnu evidenciju o kapitalnim i netipičnim trofejima.

Komisija podnosi izvještaj Ministarstvu do 1. maja svake godine za trofeje stečene u protekloj lovnoj godini.

Član 50.

Vrhunski trofeji divljači, po pravilu, ne mogu se iznositi u inostranstvo.

Pod vrhunskim trofejima divljači smatraju se oni trofeji čija je vrijednost, izražena u poenima, veća od:

za srnadaća	170 poena
za divlju svinju	135 poena
za krzno medvjeda	400 poena
za lubanju medvjeda	65 poena

Broj poena iz prethodnog stava izračunava se po važećoj formuli Međunarodnog savjeta za lovstvo i zaštitu divljači.

Ako strani državljanin ulovi divljač vrhunske trofejne vrijednosti, trofej, kao prirodnu rijetkost, može otkupiti Kanton od udruženja ili pravnog lica koje gazduje lovištem.

Udruženje ili pravno lice koje gazduje lovištem dužno je prije izlaska u lov upoznati stranog državljanina o odredbama ovog člana.

Izuzetno od odredaba stava 1. i 4. ovog člana, Ministarstvo može odobriti iznošenje u inostranstvo vrhunskog trofeja divljači, odnosno odlučiti da se trofej divljači otkupi, ako ga ne otkupi Kanton.

Vrhunski trofeji divljači, koje je otkupio Kanton, čuvaju se u muzeju Biološke zbirke.

Član 51.

Ispit za ocjenjivanje trofeja divljači polaže se pred komisijom koju obrazuje ministar.

Programne ispita za ocjenjivanje trofeja divljači, način polaganja i uslove neophodne za polaganje ovih ispita, donosi ministar.

Član 52.

Ulovljena, ranjena i uginula divljač, te njeni dijelovi pripadaju udruženju ili pravnom licu koje gazduje lovištem, ako prema lovnoprivrednoj osnovi uzgaja tu vrstu divljači u lovištu, a na površinama izvan lovišta pripada Kantonu ili licu kome je povjerena zaštita divljači na tim površinama.

Udruženju ili pravnom licu koje gazduje lovištem pripada divljač i njeni dijelovi iz prethodnog stava i ako takvu divljač ne uzgaja, dok drugi ne dokaže svoje pravo na tu divljač ili njene dijelove.

Član 53.

Divljač i njeni dijelovi mogu se držati ili prenositi iz jednog mjesta u drugo samo ako držatelj, odnosno osoba koja prenosi divljač ili njene dijelove posjeduje uvjerenje udruženja ili pravnog lica iz čijeg lovišta potiče divljač i njeni dijelovi i da su stečeni na jedan od načina određenih ovim Zakonom.

Staviti u promet, uzimati na prehranu ili preradu, može se samo divljač i njeni dijelovi za koje vlasnik posjeduje uvjerenje iz prethodnog stava, te odgovarajuću dokumentaciju o zdravstvenoj i higijenskoj ispravnosti.

Pravne i fizičke osobe koje obavljaju promet ili preradu divljači ili njenih dijelova, dužni su voditi evidenciju o vlasniku u porijeklu divljači i njenih dijelova.

Obrazac evidencije iz prethodnog stava propisuje ministar.

VII SPRJEČAVANJE ŠTETE OD DIVLJAČI I INAKNADA ŠTETE**1. SPRJEČAVANJE ŠTETE OD DIVLJAČI**

Član 54.

Udruženja i pravna lica koja gazduju lovištem dužna su preduzimati mjere za sprječavanje štete koju divljač može učiniti imovini i ljudima na zemljištu i vodi na kojima se nalazi lovište (smanjenje broja divljači, obezbjeđivanju prehrane u lovištu i dr.).

Vlasnici zemljišta i stoke, odnosno korisnici zemljišta na kome je ustanovljeno lovište dužni su na zemljištu, objektima gdje stoka prebiva i opremi koja se koristi u obradi zemlje preduzimati uobičajene mjere za sprječavanje šteta od divljači i na divljači (efikasnim ogradama, električnim čobanom, postavljanjem plašila, zaštitom mladih sadnica omotavanjem ili premazivanjem, ispaša stoke sa čobanom, učešće u progonu i sl.).

Mjere iz prethodnog stava propisuje Ministarstvo.

Član 55.

Korisnici zemljišta imaju pravo zahtijevati provođenje mjera za sprječavanje šteta od divljači, ako smatraju da udruženje ili pravno lice koje gazduje lovištem ne postupa u skladu sa odredbama člana 54. ovog Zakona.

Zahtjev iz prethodnog stava podnosi se Ministarstvu.

Član 56.

Ako je u lovištu proglašena zarazna bolest ili se može očekivati njena pojava, udruženja i pravna lica koja gazduju lovištem dužna su osigurati provedbu mjera u skladu sa propisima o zdravstvenoj zaštiti životinja, dok zaraza ili opasnost od njenog proširenja traje.

2. NAKNADA ŠTETE

Član 57.

Za štetu koju učini divljač, koja stalno živi u granicama lovišta, odgovorno je udruženje ili pravno lice koje gazduje lovištem, pod uslovom da je oštećeni preduzeo propisane mjere za sprječavanje štete od divljači, u skladu sa odredbama člana 54. stav 2. ovog Zakona.

Smatra se da divljač stalno živi u lovištu u kojem je učinjena šteta, ako udruženje ili pravno lice koje gazduje lovištem, ne dokaže suprotno.

Za štetu koju učini divljač, koja u granicama lovišta stalno ne živi, odgovorno je udruženje ili pravno lice koje gazduje lovištem za štetu pričinjenu u lovištu, ali ima pravo na odstrjel te divljači. Pravo na odstrjel ostvaruje se na osnovu dokaza o nadoknadenoj šteti oštećeniku.

Ostrjel divljači iz prethodnog stava odobrava se do visine nadoknadenе štete, računajući vrijednost mesa i trofeja divljači prema tržišnim cijenama.

Član 58.

Udruženje ili pravno lice koje gazduje lovištem i korisnici zemljišta i voda na čijem je području ustanovljeno lovište, mogu pitanje naknade štete koju divljač učini regulisati i međusobnim sporazumom (ugovaranje paušalne naknade, osiguranjem kod osiguravajućih zavoda i sl.).

Član 59.

Ako se radnjama, odnosno mjerama iz člana 54. ovog Zakona učini šteta, udruženje ili pravno lice dužno je štetu nadoknaditi vlasniku, odnosno korisniku zemljišta na kojem se nalazi lovište.

Član 60.

Za štetu koju učini lovostajem zaštićena divljač odgovorno je udruženje ili pravno lice koje gazduje lovištem u čijem je lovištu šteta učinjena, ako ovim Zakonom nije drugačije određeno.

Član 61.

Štetu koju učini divljač za koju je propisana stalna ili privremena zabrana lova, dužno je naknaditi udruženje ili pravno lice koje gazduje lovištem, odnosno Kanton čiji je organ propisao zabranu.

Izuzetno, za štetu koju učini medvjed na utvrđenim uzgojnim područjima, naknadu plaća Kanton u visini od 65%, a udruženje ili pravno lice koje gazduje lovištem u visini od 35%.

Nema odgovornosti za štetu koju učini medvjed na stoci u području gdje je paša zabranjena.

Član 62.

Za štetu, koju prilikom lova divljači učine lovci i njihovi pomoćnici, odgovorno je udruženje ili pravno lice koje gazduje lovištem, a to udruženje ili pravno lice ima pravo naknade od lovaca, odnosno njihovih pomoćnika.

Član 63.

Građani i pravna lica koji odstrije ili nanesu štetu divljači bespravnom lovom ili na drugi nezakonit način, dužni su, udruženju ili pravnom licu koje gazduje lovištem u čijem lovištu ta divljač stalno živi, naknaditi štetu prema odštetnom cjenovniku.

Odštetni cjenovnik iz prethodnog stava donosi ministar.

Sporove o naknadi štete iz stava 1. ovog člana rješava nadležni sud.

Član 64.

Prijava o učinjenoj šteti podnosi se Ministarstvu odmah, a najkasnije u roku od 2 (dva) dana od dana kada je šteta nastala.

Ministarstvo je dužno odmah, a najkasnije u roku od 2 (dva) dana po prijemu prijave, odrediti Komisiju za utvrđivanje uzroka štete i procjenu vrijednosti štete. U Komisiji mora biti stručna osoba za procjenu vrijednosti štete (poljoprivredni ili veterinarski stručnjak) i stručna osoba za utvrđivanje uzroka štete (vještak za lovstvo) sa položenim predmetom lovstva na visokoškolskoj ustanovi.

Komisija je dužna da odmah izvrši uviđaj i o svom radu sačini zapisnik. Na uviđaj se poziva oštećeni i udruženje ili pravno lice koje gazduje lovištem.

Zapisnik Komisije sadrži naročito:

- način na koji je šteta nastala;
- znakove koji upućuju da je šteta nastala od određene vrste divljači;
- obim i visinu štete; i
- mjere koje je oštećeni preduzeo da ne dođe do štete.

Troškove Komisije snosi podnosilac prijave o učinjenoj šteti.

Član 65.

Po prijemu zapisnika iz člana 64. ovog Zakona, Ministarstvo će pokušati da se utvrđivanje štete izvrši sporazumno između oštećenog i udruženja ili pravnog lica koje gazduje lovištem koje je odgovorno za naknadu štete.

Sporazum o naknadi štete sadrži naročito visinu naknade i rok njene isplate i ima snagu izvršne isprave.

Član 66.

Ako ne dođe do sporazuma iz člana 65. ovog Zakona, oštećeni može podnijeti tužbu nadležnom sudu radi utvrđivanja štete i njene visine.

Tužba se podnosi u roku od 15 dana od dana prijema pisane obavijesti da sporazum nije postignut.

VIII LOVOČUVARSKA SLUŽBA

Član 67.

Udruženje ili pravno lice koje gazduje lovištem dužno je da organizira lovočuvarsku službu. Lovočuvarsku službu vrše čuvari lovišta (u daljem tekstu: lovočuvari).

Član 68.

Lovočuvari mogu biti osobe koje imaju položen lovački ispit i ispunjavaju uslove za nošenje oružja.

Lovočuvari vrše dužnost naoružani lovačkim oružjem i uniformirani.

Lovočubar je ovlašten da:

1. od osobe zatečene sa sredstvima za lov u lovištu zahtijeva da pokaže dozvolu, odnosno lovačku kartu za lov i isprave kojima se utvrđuje identitet te osobe;

2. zahtijeva lične isprave od osobe zatečene u vršenju prekršaja ili krivičnog djela koji se odnosi na lov i od osobe za koju postoji osnovana sumnja da je izvršila takvo djelo ili prekršaj, ako ne može na drugi način da utvrdi identitet te osobe;

3. zbog pronalaza predmeta kojima je izvršen prekršaj ili krivično djelo koji se odnosi na lov, vrši pregled vozila i drugih sredstava za prijevoz i prenošenje stvari za koja postoji osnovana sumnja da prevoze, odnosno prenose ulovljenu divljač, dijelove ulovljene divljači i trofeje divljači;

4. pregleda ulov i sredstva za lov, kao i da utvrdi da li je lov obavljen u skladu sa propisima;

5. privremeno oduzme i bez odlaganja preda udruženju ili pravnom licu ulov, sredstva za lov, kao i druge predmete pronađene u lovištu, ako postoji osnovana sumnja da su upotrijebljeni ili bili namijenjeni za izvršenje krivičnog djela ili prekršaja koji se odnose na lov, ili da su nastali ili pribavljeni izvršenjem takvog krivičnog djela ili prekršaja.

U slučajevima iz stava 3. ovog člana, osoba koja je zatečena sa sredstvima za lov u lovištu dužna je da, na zahtjev lovočuvara, pokaže dozvolu za lov, odnosno lovačku kartu i ispravu kojom se utvrđuje njen identitet, kao i da omogućiti pregled ulova, sredstava za lov, pregled vozila i drugih sredstava za prijevoz i prenošenje stvari.

Član. 69.

Lovočuvari imaju legitimaciju.

Legitimaciju izdaje udruženje ili pravno lice koje postavlja lovočuvara, na osnovu uputstva o obliku i sadržaju legitimacije koje propisuje ministar.

IX NADZOR

Član 70.

Nadzor nad provođenjem ovog Zakona, propisa donesenih na osnovu ovog Zakona i drugih propisa iz oblasti lovstva, vrši Ministarstvo.

Poslove inspekciskog nadzora nad provođenjem ovog Zakona, propisa donesenih na osnovu ovog Zakona i drugih propisa iz oblasti lovstva, vrši Ministarstvo putem kantonalnih lovnih inspektora.

Član 71.

U vršenju poslova inspekciskog nadzora, kantonalni lovni inspektor naročito je ovlašten da:

1. kontrolira da li udruženje ili pravno lice koje gazduje lovištem ispunjava propisane uslove za gazdovanje;

2. pregleda lovnoprivrednu osnovu i provjerava kako se ona primjenjuje;

3. kontrolira da li je godišnji plan gazdovanja lovištem u skladu sa lovnoprivrednom osnovom;

4. kontrolira primjenu godišnjeg plana gazdovanja lovištem, poslovne knjige i ostalu dokumentaciju kada je to potrebno zbog kontrole primjene propisa i mjera koje se odnose na lovišta i divljač;

5. kontrolira način lova divljači kao i način izdavanja dozvola za lov;

6. pregleda radove i objekte u lovištima;

7. oduzima, do odluke nadležnog organa, bespravno ulovljenu ili bespravno prisvojenu uginulu divljač i njene dijelove, kao i predmete kojima su izvršene ove bespravne radnje;

8. naredi privremene mjere za sprečavanje štete u hitnim slučajevima u kojima bi mogla nastupiti šteta;

9. prikuplja, kada je to potrebno, obavještenja od svjedoka, vještaka, odgovornih i drugih osoba; i

10. preduzima i druge mjere i radnje za koje je ovlašten ovim Zakonom i drugim propisima.

Član 72.

Ako kantonalni lovni inspektor prilikom vršenja inspekciskog nadzora ustanovi da propis nije primijenjen ili da je nepravilno primijenjen donijet će rješenje kojim će naložiti otklanjanje utvrđenih nepravilnosti i odrediti rok u kome se one moraju otkloniti.

Ako je zakonom ili drugim propisima predviđeno da se za utvrđenu nepravilnost primjenjuju određene upravne mjere, inspektor će izreći i te mjere.

Član 73.

Protiv rješenja kantonalnog lovnog inspektora može se izjaviti žalba ministru.

Rješenje ministra doneseno po žalbi je konačno.

Žalba ne odlaže izvršenje rješenja ako se radi o preduzimanju hitnih mjera u općem interesu koje se ne mogu odlagati ili ako bi usljed odlaganja izvršenja bila nanosena veća materijalna šteta ili ako bi bili ugroženi životi i zdravlje ljudi.

Član 74.

Za kantonalnog lovnog inspektora može se postaviti diplomirani inženjer šumarstva koji ima položen stručni ispit i najmanje tri godine radnog iskustva na poslovima iz oblasti lovstva.

Kantonalni lovni inspektor dužan je pri obavljanju svoje dužnosti imati legitimaciju, koju izdaje ministar.

X KAZNE NE ODREDBE

Član 75.

Novčanom kaznom u iznosu od 3.000,00 KM do 10.000,00 KM kaznit će se za prekršaj udruženje ili pravno lice koje gazduje lovištem ako:

1. lovi, proganja ili namjerno uznemirava određenu vrstu divljači za vrijeme zabrane lova ili lovostaja ili na drugi način ugrozi opstanak bilo koje vrste divljači u prirodi (član 6. stavovi 2. i 3.);

2. ne odredi privremenu zabranu lova u skladu sa članom 11. stavovi 1. i 2.;

3. lovi ptice i sisavce korisne za poljoprivredu i šumarstvo ili kvari i uništava njihova gnijezda i legla ili skuplja i uništava mladunčad i jaja (član 14.);

4. ne vodi katastar lovišta i ne obavještava Ministarstvo o promjenama koje nastanu u toku gazdovanja lovištem (član 26. stavovi 2. i 3.);

5. ne donese lovnoprivrednu osnovu (član 28. stav 2.);

6. ne donese godišnji plan u propisanom roku (član 31. stavovi 1. i 2.);

7. ne koristi ostvarena sredstva po osnovu ugovora o davanju lovišta na korištenje u skladu sa članom 35.;

8. ne uredi uslove i način pod kojim se može vršiti lov divljači, kao i učešće lovaca u iskorištavanju ulova u lovištu (član 38.);

9. lovi divljač sredstvima koja nisu predviđena članom 39.;

10. učini bilo koju zabranjenu radnju iz člana 40.;

11. vrši trovanje divljači (član 44. stav 1.);

12. omogućiti iznošenje trofeja divljači iz lovišta protivno odredbi člana 48. stav 3.;

13. bez odobrenja iznosi ili omogućiti iznošenje u inostranstvo vrhunskih trofeja divljači (član 50.);

14. ne preduzme mjere za sprječavanje štete koju divljač može učiniti imovini i ljudima na zemljištu i vodi na kojima se nalazi lovište (član 54. stav 1.);
15. ne osigura provođenje mjera iz člana 56.;
16. ne organizira lovočuvarsku službu (član 67.); i
17. za čuvara lovišta odredi osobu koja ne ispunjava uslove iz člana 68. stav 1.

Novčanom kaznom u iznosu od 300,00 KM do 1.000,00 kaznit će se za prekršaj iz prethodnog stava i odgovorno lice u udruženju ili pravnom licu koje gazduje lovištem.

Član 76.

Novčanom kaznom u iznosu od 1.000,00 KM do 5.000,00 KM kaznit će se za prekršaj udruženje ili pravno lice koje gazduje lovištem ako:

1. ne dostavi godišnji plan Ministarstvu u roku iz člana 31. stav 4.;
2. ne vodi evidenciju propisanu članom 32.;
3. ne izda trofejni list i ne vodi evidenciju o izdatim trofejima divljači (član 48. stav 4.);
4. ne upozna stranog državljanina o odredbama član 50. stav 4.;
5. drži ili prenosi divljač i njene dijelove bez uvjerenja i ako ne vodi propisanu evidenciju (član 53.);
6. ne izda legitimaciju lovočuvara (član 69. stav 2.); i
7. ne uskladi svoje poslovanje, odnosno opća akta sa odredbama ovog Zakona i propisima donesenim na osnovu ovog Zakona (član 81.).

Novčanom kaznom u iznosu od 100,00 KM do 500,00 KM kaznit će se za prekršaj iz prethodnog stava i odgovorno lice u udruženju ili pravnom licu koji gazduju lovištem.

Član 77.

Novčanom kaznom u iznosu od 100,00 KM do 800,00 KM kaznit će se za prekršaj fizičko lice ako:

1. upotrebljava hemijska sredstva štetna za zdravlje divljači na način koji je opasan za divljač i ako o upotrebi otrovnih sredstava ne obavijesti udruženje ili pravno lice, odnosno organ koji gazduje lovištem (član 13.);
2. lovi ptice i sisavce korisne za poljoprivredu i šumarstvo ili kvari i uništava njihova gnijezda i legla ili sakuplja i uništava mladunčad i jaja (član 14.);
3. pušta pse i mačke da se bez kontrole kreću po lovištu (član 15. stavovi 1. i 2.);
4. postupa suprotno članu 37.;
5. lovi sredstvima koja nisu predviđena članom 39.;
6. učini bilo koju zabranjenu radnju iz člana 40.;
7. vrši trovanje divljači (član 44. stav 1.);
8. postupa protivno odredbi člana 45.;
9. lovi divljač, a nema položen lovački ispit (član 43. stav 1.);
10. iznosi trofeje divljači iz lovišta protivno odredbi člana 48. stav 3.;
11. vrhunski trofej divljači iznese u inostranstvo (član 50.);
12. drži ili prenosi divljač i njene dijelove bez uvjerenja i ako ne vodi propisanu evidenciju (član 53.).

Član 78.

Za prekršaj iz člana 75. stav 1. tačke 1., 3., 9., 10. i 11., člana 76. stav 1. tačka 5., i člana 77. stav 1., uz izrečenu novčanu kaznu, izreći će se i zaštitna mjera oduzimanja predmeta koji su upotrijebljeni za izvršenje prekršaja.

Za prekršaje iz prethodnog stava počiniocu prekršaja će se oduzeti imovinska korist pribavljena izvršenjem prekršaja.

XI PRIJELAZNE I ZAVRŠNE ODREDBE

Član 79.

Za lovišta za koja nisu donesene lovnoprivredne osnove, iste se moraju donijeti u roku od 12 mjeseci od dana donošenja Pravilnika o izradi lovnoprivredne osnove.

Do donošenja lovnoprivredne osnove iz prethodnog stava gazdovanje lovištem vršit će se na osnovu godišnjeg plana gazdovanja odobrenog od strane Ministarstva.

Član 80.

Udruženja i pravna lica koja gazduju lovištem u postojećim lovištima dužni su svoje poslovanje, odnosno opća akta uskladiti s odredbama ovog Zakona i propisima donesenim na osnovu ovog Zakona, u roku od šest mjeseci od dana stupanja na snagu ovog Zakona.

Član 81.

Propisi, odnosno druga akta, za čije je donošenje po ovom zakonu ovlašteno Ministarstvo i Savez lovačkih društava Kantona, donijet će se u roku od 6 (šest) mjeseci od dana stupanja na snagu ovog Zakona.

Član 82.

Do stupanja na snagu propisa iz člana 81. ovog Zakona primjenjivat će se propisi doneseni na osnovu Zakona o lovstvu ("Sl. list SR BiH", br. 7/77 i 30/90), ako nisu u suprotnosti sa ovim Zakonom.

Član 83.

Lovočvar koji nema lovački ispit dužan je isti položiti u roku od godinu dana od dana stupanja na snagu ovog Zakona.

Član 84.

Stupanjem na snagu federalnog Zakona o lovstvu ovaj Zakon će se uskladiti sa odredbama federalnog Zakona.

Član 85.

Ovaj Zakon stupa na snagu osmog dana od dana objavljivanja u "Službenim novinama Tuzlanskog kantona".

Bosna i Hercegovina
Federacija Bosne i Hercegovine
TUZLANSKI KANTON
Skupština
Broj: 01-02-699-10/01
Tuzla, 6. 12. 2001. godine

Predsjednik

Dr. Izet Žigić, v.r.

435

Na temelju poglavlja IV, odjeljak B, članka 33. stavak 1. točka e) Ustava Tuzlanskog kantona, donosim

UKAZ

O PROGLAŠENJU ZAKONA O LOVSTVU

Proglašava se Zakon o lovstvu, koji je donio Sabor Tuzlanskog kantona na sjednici od 6. 12. 2001. godine.

Broj: 01-2018/01
Tuzla, 20. 12. 2001. godine

Predsjednik
Tuzlanskog kantona,
Mr. Selim Bešlić, v.r.